

COMPLEANNO

Votantadu !

Me l'avessen dii g'avria mai credu!
Che bel'età! Chi l'avria pensaa
Che saria fin chi rivaa?
E de riussì a portà inscì tanti ann,
Quarantun de chi e quarantun de là
Tut' in sui spall senza boffà!

O car Signor, s' te voeuret de mi
De lassam chi fin' a 'sto di?
O l'è sta la Madona, 'na Mama inscì bona
Che t'ha dii per mi 'na parolina
De fam sveglià ammò 'sta matina
San e content com' el dì prima?

Mi so pu come ringraziaa
De vess rivaa a 'sta bel'età.
Vorarà dì che s'ho de campàa
Ammò 'n quai an 'bastanza san
I a spendarò per somenàa
Quel tanto ben c' ho ricevù,
Tuta grazia del bon Gesù
E de la so Mama che anca per mi
l'è 'na Mama: l'è propi inscì!


De vess nassu giust el so di
Vundes febrar, quand l'è aparsa
A Bernadette, a Lourdes, in Fransa
L'è staa on segn c'ho tegnu de ment
Tuta la vita, tut' i moment.

L'età l'avanza, coi so magagn
Ognun g'ha i so e mi g'ho i mee
Ma, grazie a Dio, sont anmò in pee.
Se me domandì se som content
D'avée spendu tut el me temp
A servì 'l Signor e la sua Gesa:
L'è propi vera, mia cara gent
E tut' i dì l'è 'na sorpresa!
Fin ch'el Signor me lassarà chi
De faa quel che podi ogni moment
Per Lu e per vialter sarò content.

Quel che cunta mi l'ho capii
E l'è de digh semper de sì
'Me la Madona l'ha faa 'nca Lee
Al so Signor tirandos no indrée.
Fin quand rivarà anca quel dì
Che 'l San Giusepp e la Vergin Santa
Me compagneran incontr' a Lu:
El me Signor, el bon Gesù.



S. Cresima



Giovane Sacerdote